

LE IVSTE
BANNISSEMENT
DES IESVITES HORS DV
ROYAVME DE FRANCE.



A PARIS,
Chez IAMET METTAYER, & PIERRE
L'HVILLIER, Imprimeurs & Libraires
ordinaires du Roy.
M. D. XCV.



Digitized by the Internet Archive
in 2020 with funding from
Getty Research Institute

<https://archive.org/details/leivstebannisse00unse>



LE IVSTE BANNISSEMENT
DES IESVITES HORS DV
Royaume de France.


I.

France, qui doucement m'as baillé la mammelle
Comme à l'un de tes fils, & de tes nourrissons:
France, à qui j'ay voüé les airs & les chansons,
Que Clion m'enseigna sur sa croupe iumelle.
Je veux en ta faueur d'une ancre faicte à Délé
Marquer sur mon papier en cent & cent façons
Le iour, qui a chassé toutes les trahisons,
Qu'on brassoit contre toy d'une façon cruelle:
Je dis le iour heureux de ce bannissement,
Qui chassa loin de toy du tout entierement
Ceux, qui vouloient ranger deffous l'obeyssance
Du Royaume Espagnol ton Royaume François:
Si bien que les chassant on a tout à la fois
En mesme iour banny l'Espagne de la France.

A ij



II.

 *L'extreme arrogance, ou plustost felonnie!*
Le saint nom de I E S V S, qui regne dans les cieux,
Estoit le nom commun de ces seditieux,
Qui de ce graue nom nommoient leur compagnie.
Des Apostres & Saincts la troupe tant benie,
Ne print iamais ce nom trop grand & precieux:
Car ils se nommoient tous d'un cœur deuotieux
Serviteurs de I E S V S, par humbleesse infinie.
O vous, qui n'estes pas ses esleuz & mignons,
Ny ses Saincts seulement, mais ses vrais compagnons,
Dites, comme estes vous de sa troupe & sa bande?
Vous n'en fustes iamais, ainsi chacun le croit:
Ou si vous en estiez, il faut que l'on entende
Que c'est de la façon que Judas en estoit.



III.

Pythagore à Crotone auoit toute creance
Pour sa science rare & pour son grand sçauoir:
Chacun prenoit plaisir à l'aimer & le veoir,
Et à luy faire honneur, respect, & reuerence.
Mais depuis abusant quasi à toute outrance
De son autorité, & de son grand pouuoir,
En secrette assemblee il pratiqua d'auoir
Trois cens hommes vnis par serment & fiance.
Mais le peuple craignant la sourde intention
D'une telle assemblee & congregation,
Deuant qu'il en vint mal les chassa de sa ville.
Helas! tu deuois bien, France, chasser ainsi
Ces cauts monopoleux, deuant qu'on vist icy
Par leur moyen, ta perte & ta guerre ciuile.



IIII.

P Vis qu'on les a bannis du Royaume de France,
 Ces espions d'Espagne entierement rusez,
 Noz peuples plus par eux ne seront abusez,
 Et l'Estat reprendra sa premiere assurance.
 Les bons ne seront plus en crainte ny en trance:
 Noz trois lys fleuriront honorez & prisez:
 Noz bras ne seront plus en complainte croisez:
 Du bien & du repos nous aurons esperance.
 Chacun en bonne paix sera dans sa maison:
 Du plaisant siecle d'or reuiendra la saison:
 D'icy fuira bien loin le discord & la noise.
 Le peuple sera sage, au lieu qu'il estoit fol:
 Le François ne sera iamais plus Espagnol.
 Et la France à ce coup sera toute Françoisse.



V.


Grand Oracle des loix, ornement de la France,
 Appuy de la vertu, temple de l'équité,
 Bras, qui portes tousiours, & tousiours as porté
 D'Astree & de Themis l'équitable balance.
 Sainct & sacré Senat, comme vn foudre s'eslance
 Dessus quelque haut pin en pieces esclaté:
 Ainsi ton iuste arrest & ton authorité
 Terrasse l'Espagnol, & toute sa puissance.
 Dequoy nous seruoit-il d'auoir tant de milliers
 De pietons en campagne, & tant de Cavaliers?
 Si tous ces espions à la France infideles
 N'eussent esté chassés comme nous les chassons:
 Puisque dans nos Citez, leurs places & maisons
 Esioient pour l'Espagnol autant de citadelles?



VI.

Saint Archange de Dieu, & l'Ange tutelaire,
 Qui as incessamment souz ta protection
 Tenu nostre Royaume & nostre nation,
 Souuent chassant de nous la diuine cholere.
 Et toy bon saint Denis, grand & rare exemplaire
 De sçauoir, de vertu, & de deuotion,
 Qui à noz vieux François apprins d'affection
 Comment à Iesus Christ vn Chrestien doit complaire.
 Priez le Dieu puissant, qu'il ait en fin pitié
 Du Royaume François aigrement chastié:
 Et que le grand Henry, que son bras accompagne,
 De palme & de lauriers ayant les cheueux ceints,
 Comme Charles le Grand, à luy & à ses saints,
 Des Eglises bastisse au fin fond de l'Espagne.

FIN.



SPECIAL

DC

122.8

T52

11594

87-B

1082

Bound w/

87-B

2893

87-B

2894

THE GETTY CENTER
LIBRARY

